



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726 400
fax. +387 33 726 423
e – mail: info@voda.ba

Broj: **UP-I/21-3-40-460-4/21**
Datum: **22.11.2021. god**

«Agencija za vodno područje rijeke Save» Sarajevo rješavajući po zahtjevu pravnog lica «MGV GRADNJA» d.o.o. Zavidovići za donošenje rješenja o vodnoj dozvoli za aktivnost koja može privremeno ili trajno degradirati kvalitet voda ili ometati poboljšanje njihovog postojećeg kvaliteta u postupku rada i za ispuštanje tehnoloških otpadnih voda u prirodni recipijent sa lokaliteta betonare sa postrojenjem za proizvodnju praškastih materijala u Zavidovićima, na osnovu člana 109. stav (1) tačka 2. i stav (2) tačka 1. Zakona o vodama («Službene novine Federacije BiH», broj 70/06) i člana 200. stav (1) Zakona o upravnom postupku («Službene novine Federacije BiH», broj 2/98 i 48/99), donosi

R J E Š E N J E **o vodnoj dozvoli**

1. Pravnom licu, «MGV GRADNJA» d.o.o. Zavidovići daje se vodna dozvola za aktivnost koja može privremeno ili trajno degradirati kvalitet voda ili ometati poboljšanje njihovog postojećeg kvaliteta u postupku rada i za ispuštanje tehnoloških otpadnih voda u prirodni recipijent sa lokaliteta betonare sa postrojenjem za proizvodnju praškastih materijala u ul. Tvornička izgrađene na zemljištu označenom kao k.č. broj: 1295/4 K.O. Zavidovići, općina Zavidovići.
2. Ova vodna dozvola se odnosi isključivo na aktivnosti koje mogu privremeno ili trajno degradirati kvalitet voda ili ometati poboljšanje njihovog postojećeg kvaliteta u postupku rada i ispuštanje tehnoloških otpadnih voda u prirodni recipijent za objekat definisan tačkom 1. ovog Rješenja i ne oslobađa podnosioca zahtjeva obaveze pribavljanja vodne dozvole za ispuštanje sanitarno-fekalnih otpadnih voda, a za čije izdavanje je nadležno Ministarstvo za poljoprivredu, šumarstvo i vodoprivredu Zeničko-dobojskog kantona ili općina, ukoliko je kantonalnim propisom prenesena nadležnost na općinu, shodno stavu (3) istog člana zakona.
3. Vodna dozvola se daje na osnovu dostavljene dokumentacije, utvrđenog činjeničnog stanja tokom uviđaja izvršenog na lokaciji objekta i uz sljedeće uslove:
 - 3.1. Da se upotreba i korištenje predmetne betonare i postrojenja vrši u skladu sa njegovom prirodom i namjenom te u skladu sa dostavljenom dokumentacijom i uslovima iz ove vodne dozvole.
 - 3.2. Da se, za vrijeme trajanja ove dozvole, u potpunosti završe radove na uređenju platoa, radnih i manipulativnih površina oko objekata te da se izgradi posebno okno za monitoring prije ispusta prečišćenih voda u rijeku Bosnu sa prostora betonare.
 - 3.3. Da se, za vrijeme trajanja ove dozvole, obezbijedi da se tehnološke otpadne vode nastale u proizvodnom postupku spravljanja i proizvodnje betona te pranjem vozila za transport betona i spiranjem radnih površina (lokalitet betonare) nesmetano prikupljaju sistemom slivnih rešetki i kanalizacione mreže te odvede do objekta za tretman tehnoloških otpadnih voda (taložnik) a zatim ovako tretirane vode preko okna za monitoring ispuštaju u rijeku Bosnu.
 - 3.4. Da se, za vrijeme trajanja ove dozvole, obezbijedi da se tehnološke otpadne vode nastale pranjem tehnološke opreme u postupku proizvodnje praškastih proizvoda (otpadne vode iz laboratorije) i pranjem poda hale, zajedno sa onečišćenim oborinskim vodama sa platoa, radnih i manipulativnih površina (lokalitet hale za proizvodnju praškastih proizvoda) nesmetano prikupljaju sistemom slivnih rešetki i kanalizacione mreže te odvede do objekta za tretman tehnoloških otpadnih voda (separator ulja i masti) a zatim ovako tretirane vode preko okna za monitoring ispuštaju u rijeku Bosnu.
 - 3.5. Da korisnik predmetnog objekta, za vrijeme trajanja ove dozvole, uradi projekat izvedenog stanja vanjskih hidroinstalacija kompletnog kompleksa sa detaljnim prikazom načina prikupljanja, odvodnje i tretmana nastalih tehnoloških i drugih otpadnih voda sa naznačenim mjestima ispusta prečišćenih voda u recipijent. Investiciono-tehnička dokumentacija treba

- biti urađena i revidovana od strane pravnih lica koja imaju ovlaštenje (lista «A») pribavljeno od strane Federalnog ministarstva poljoprivrede, vodoprivrede i šumarstva.
- 3.6. Prečišćene otpadne vode, prije ispuštanja u recipijent – rijeka Bosna na oba kontrolna mjesta, moraju ostati u maksimalno dopuštenim granicama definisanim u Prilogu 27. Uredbe o uslovima ispuštanja otpadnih voda u okoliš i sisteme javne kanalizacije («Službene novine Federacije BiH», broj 26/20 i 96/20).
 - 3.7. Objekte čija je svrha odvođenje i prečišćavanje tehnoloških otpadnih voda (taložnik, separator ulja i masti, slivnici, kanalizaciona mreža) treba redovno održavati i koristiti na način koji će obezbijediti njihovu potpunu ispravnost i funkcionalnost.
 - 3.8. Korisnik je obavezan da redovno vodi dnevnik o pražnjenju i odvozu sadržaja taložnika i separatora ulja i masti.
 - 3.9. Korisnik objekata je dužan, putem laboratorije ovlaštene od strane Federalnog ministarstva poljoprivrede, vodoprivrede i šumarstva, vršiti redovna ispitivanja kvaliteta otpadnih voda, uzimanjem uzorka efluenta iz oba okna za monitoring u skladu sa Uredbom o uslovima ispuštanja otpadnih voda u okoliš i sisteme javne kanalizacije. Učestalost i način ispitivanja vršiti u skladu sa članom 20. Uredbe o uslovima ispuštanja otpadnih voda u okoliš i sisteme javne kanalizacije. Rezultate analiza dostaviti ovoj Agenciji.
 - 3.10. Izvještaje o ispitivanju i ocjeni kvaliteta otpadnih voda može uraditi isključivo laboratorija ovlaštena od strane Federalnog ministarstva poljoprivrede, vodoprivrede i šumarstva po osnovu člana 64. stav (3) Zakona o vodama i Pravilnika o uslovima koje moraju ispunjavati referentne odnosno ovlaštene laboratorije za ispitivanje voda, sadržaj i način davanja ovlasti («Službene novine Federacije BiH», broj 14/10, 14/13, 26/14, 23/17 i 41/20).
 - 3.11. Talog iz separatora i taložnika kao i ostali opasni i neopasni otpad se ne smije ni privremeno odlagati na česticu «vodno dobro», odnosno u vodotoke i na njegove obale.
 - 3.12. Investitor je obavezan pridržavati se svih mjera i uslova propisanih u saglasnostima i dozvolama izdatim od strane drugih nadležnih organa, a odnose se na korištenje i zaštitu voda i nisu u suprotnosti sa uslovima iz ove vodne dozvole.
4. Vlasnik, odnosno korisnik objekta je obavezan voditi propisane evidencije te nadležnim organima dostavljati propisane obrasce (Obrazac EBS) u skladu sa Zakonom o vodama i Pravilnikom o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte vodne naknade i posebnih vodnih naknada («Službene novine Federacije BiH», broj 92/07, 46/09, 79/11, 88/12 i 03/16), Prilog 1. Poglavlje V – Određivanje koeficijenata zagađenja za zagađivače voda kod kojih se ne vrše direktna mjerenja voda te prema dostavljenim obrascima izvršavati u cjelosti i u propisanim rokovima obavezu plaćanja vodnih naknada.
 5. U periodu važenja ove dozvole, Korisnik je dužan provoditi sve mjere i aktivnosti propisane istom.
 6. U slučaju izvanrednih situacija, havarijskih onečišćenja i drugih sličnih okolnosti, čime bi bio ugrožen kvalitet podzemnih i površinskih voda, korisnik predmetnih proizvodnih objekata obavezan je izvijestiti nadležne organe i izvršiti izvanredna postupanja po nalogu nadležnih organa, te o vlastitom trošku uzroke štete otkloniti, a nastale štete nadoknaditi.
 7. Ukoliko usljed štetnog djelovanja voda nastalog zbog neizgrađenosti ili nedovoljne osposobljenosti (zaštitnih) vodnih objekata dođe do nastanka štete na predmetnom pogonu obuhvaćenom ovom vodnom dozvolom, korisnik zaštitnih vodnih objekata nije odgovoran za nastale štete.
 8. Ukoliko radom predmetne betonare sa postrojenjem za proizvodnju praškastih proizvoda dođe do šteta ma kakvog karaktera, korisnik vodne dozvole je dužan uzroke nastalih šteta otkloniti, a nastale štete trećim licima nadoknaditi.
 9. Prava stečena po ovoj dozvoli ne mogu se prenositi na treća lica, a ista prestaju u skladu sa odredbama Zakona o vodama.
 10. U ovoj upravnoj stvari plaćene su sve upravne pristojbe.
 11. Ova vodna dozvola, shodno članu 117. stav (1) i 129. Zakona o vodama se daje sa rokom važenja od 2 (dvije) godine od dana pravosnažnosti ovog rješenja.
 12. Prije isteka važnosti ove dozvole Korisnik je dužan da podnese zahtjev za izdavanje nove vodne dozvole.
 13. Ovo rješenje o vodnoj dozvoli može se izmjeniti ukoliko za to nastupe razlozi utvrđeni u članu 130. stav (1) tačka 1., 2., 3. ili 4. Zakona o vodama, a zainteresirane stranke podnesu argumentiran zahtjev za izmjenu ovog vodnog akta.

Obrazloženje

Pravno lice «MGV GRADNJA» d.o.o. Zavidovići, dana 29.09.2021. godine, podnijelo je zahtjev za izdavanje vodne dozvole za aktivnost koja može privremeno ili trajno degradirati kvalitet voda ili ometati poboljšanje njihovog postojećeg kvaliteta u postupku rada i za ispuštanje tehnoloških otpadnih voda u prirodni recipijent sa lokaliteta betonare sa postrojenjem za proizvodnju praškastih materijala u ul Tvornička na zemljištu označenom kao k.č. broj: 1295/4 K.O. Zavidovići, općina Zavidovići.

U provedenom postupku dostavljena je i pregledana sljedeća dokumentacija:

- Ovjerena kopija Rješenja o registraciji u sudski registar broj: 043-0-Reg-11-000968 izdatog dana 01.09.2011. godine od strane Općinskog suda u Zenici,
- Ovjerena kopija Rješenja o izmjenama podataka u sudski registar broj: 043-0-Reg-19-000184 izdatog dana 21.02.2019. godine od strane Općinskog suda u Zenici,
- Ovjerena kopija Uvjerjenja o poreznoj registraciji izdatog dana 23.09.2011. godine od strane Porezne uprave – Kantonalni ured Zenica,
- Punomoć zastupnika podnosioca zahtjeva od 27.09.2021. godine,
- Kopija Rješenja o legalizaciji bespravno izgrađenih objekata broj: 12-23-1497/08 izdatog dana 09.09.2009. godine od strane Ministarstva za prostorno uređenje, promet i komunikacije i zaštitu okoline Zeničko-dobojskog kantona (izdato za GPD «KRIVAJA-GRADNJA» d.o.o. Zavidovići),
- Kopija Rješenja o odobrenju izvođenja radova na izmjeni namjene broj: 06-23-2194/19-UP-1-2 izdatog dana 29.10.2020. godine od strane Službe za upravu geodetskih, imovinsko pravnih poslova i urbanizma Općina Zavidovići,
- Kopija Rješenja o upotrebi objekta/izmjena namjene, rekonstrukcija i dogradnja postojeće hale broj: 06-19-1693/21-UP-1-5 izdatog dana 16.06.2021. godine od strane Službe za upravu geodetskih, imovinsko pravnih poslova i urbanizma Općina Zavidovići,
- Idejni projekat – hidrotehnička faza za Fabriku praškastih materijala Zavidovići Investitora «MGV GRADNJA» d.o.o. Zavidovići urađen u svrhu pribavljanja vodnih akata od strane URBIS CENTAR d.o.o. Banja Luka (broj: 38-P/2021, januar 2021. godine) – na uvid,
- Glavni projekat – izmjena namjene, rekonstrukcija i dogradnja proizvodne hale Investitora «MGV GRADNJA» d.o.o. Zavidovići urađen od strane «MOSANA» d.o.o. Žepče broj: MGV-03-02/19, mart 2019. godine i revidovan od strane «LEDOUX» d.o.o. Žepče, oktobar 2020. godine (na uvid),
- Elaborat o zaštiti okoline «MGV GRADNJA» d.o.o. Zavidovići – Pogon za proizvodnju praškastih materijala urađen od strane Instituta za zaštitu, ekologiju i obrazovanje d.o.o. Tuzla, septembar 2016. godine (na uvid),
- Dokaz o uplaćenju upravnoj taksi na zahtjev.

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u cilju utvrđivanja relevantnih činjenica u ovoj upravnoj stvari.

Nakon pregleda dostavljene dokumentacije, u skladu sa članom 12. stav (5) i (6) Pravilnika o sadržaju, obliku, uvjetima i načinu izdavanja i čuvanja vodnih akata, («Službene novine Federacije BiH», broj 31/15, 55/19 i 41/20), izvršen je obilazak predmetnog lokaliteta u ul Tvornička u Zavidovićima i tom prilikom sačinjen je zapisnik o uviđaju broj: UP-I/21-3-40-460-3/21 od 04.11.2021. godine.

Na osnovu dostavljene dokumentacije i izvršenog uviđaja na licu mjesta utvrđeno je sljedeće:

- Predmetni proizvodni kompleks objekata izgrađen je na lijevoj obali rijeke Bosne u ul Tvornička u Zavidovićima. Na parceli označenoj kao k.č. broj: 1295/4 K.O. Zavidovići izgrađena je betonara kapaciteta 20-24m³/h (izdato rješenje o upotrebi/legalizaciji bespravno izgrađenih objekata 2009. godine od strane nadležnog Ministarstva Ze-do kantona) a ranije izgrađena hala za proizvodnju betonske galanterije je adaptirana i rekonstruisana u halu sa postrojenjem za proizvodnju praškastih proizvoda (izdato rješenje o upotrebi u junu 2021. godine od strane nadležne službe Općine Zavidovići). Osim navedenih objekata kompleks čine djelimično uređene radne i manipulativne površine, taložnik, separator ulja i masti sa koalescentnim filterom, plato za pranje vozila za transport betona, okno za monitoring.

- Pogon za proizvodnju praškastih materijala obuhvata bijelu (dekorativni malter) i sivu liniju proizvoda (ljepila za keramiku, mašinski malteri, ljepilo za siporeks i stiropor). Proces proizvodnje je potpuno automatizovan - instaliran je sistem za prikupljanje prašine (3 filterska sistema). U samom procesu proizvodnje praškastih materijala (planirani kapacitet je 10t/h gotovih proizvoda) se ne koristi voda ali se ista koristi u procesu spravljanja betona.
- Snabdijevanje pitkom vodom za sanitarne i tehnološke potrebe riješeno je priključkom na gradski vodovodni sistem.
- Sanitarne i fekalne vode iz sanitarnog bloka za uposlene se prikupljaju zasebnom kanalizacionom mrežom i ispuštaju u septičku jamu.
- Tehnološke otpadne vode nastale u procesu spravljanja betona i pri pranju vozila za transport betona i tehnološke opreme se sistemom kanala prikupljaju i odvoje na tretman u taložnik. Izdvojeni pijesak i sitne kamene čestice se vraćaju u proces proizvodnje a prečišćena voda se nakon taloženja direktno ispušta u recipijent – rijeka Bosna (mjerno mjesto br 1).
- Tehnološke otpadne vode nastale pranjem tehnološke opreme u postupku proizvodnje praškastih proizvoda (pranjem kalupa i posuda u prostoru laboratorije) i povremenim pranjem poda hale se zajedno sa onečišćenim oborinskim vodama sa platoa, radnih i manipulativnih površina prikupljaju zasebnim kanalizacionim sistemom sa slivnim rešetkama te odvoje na tretman u separator masti i ulja. Prečišćene vode se preko okna za monitoring, ispuštaju u rijeku Bosnu (mjerno mjesto br 2).
- Parcela na kojoj je izgrađen predmetni kompleks objekata je djelimično ugrožena velikim vodama rijeke Bosne ranga pojave 1/100.
- Manipulativne i radne površine odnosno radni platoi nisu završno betonirani/asfaltirani kako je predviđeno projektnom dokumentacijom na osnovu koje je izdato odobrenje za građenje a potom i upotrebu.
- Za predmetni kompleks je podnesen zahtjev za izdavanje okolinske dozvole nadležnom ministarstvu Zeničko-dobojskog kantona.

Na osnovu dostavljene dokumentacije i uviđaja izvršenog na predmetnoj lokaciji, u svrhu smanjenja negativnih uticaja predmetnog postrojenja i aktivnosti na stanje voda i vodni režim, podnosiocu zahtjeva su ovom vodom dozvolom u tački 3. dispozitiva Rješenja propisani uslovi kojih se dužan pridržavati prilikom korištenja objekta u skladu sa odredbama članova 53. i 116. Zakona o vodama i članova 12. i 13. Pravilnika o sadržaju, obliku, uvjetima načinu izdavanja i čuvanja vodnih akata i odredbama člana 3. tačka s) i člana 14. Uredbe o uslovima ispuštanja otpadnih voda u okoliš i sisteme javne kanalizacije.

Tačka 4. dispozitiva Rješenja je propisana u skladu sa tačkama 12. i 35. Pravilnika o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte i posebnih vodnih naknada («Službene novine Federacije BiH», broj 92/07, 46/09, 79/11, 88/12 i 03/16) i Odlukom o visini posebnih vodnih naknada («Službene novine Federacije BiH», broj 46/07, 10/14 i 03/16).

Na osnovu provedenog postupka konstatuje se da je podnosilac zahtjeva, «MGV GRADNJA» d.o.o. Zavidovići ispunio minimum uslova za izdavanje vodne dozvole za aktivnost koja može privremeno ili trajno degradirati kvalitet voda ili ometati poboljšanje njihovog postojećeg kvaliteta u postupku rada i za ispuštanje tehnoloških otpadnih voda u prirodni recipijent sa lokaliteta betonare sa postrojenjem za proizvodnju praškastih materijala u ul Tvornička, općina Zavidovići, te je riješeno kao u dispozitivu ovog Rješenja.

Uplaćeni su i posebni troškovi prema Zaključku ove Agencije broj: UP-I/21-3-40-460-2/21 od 18.10.2021. godine.

Podnosilac zahtjeva je uplatio upravnu taksu u iznosu od 70 KM u skladu sa Zakonom o federalnim upravnim taksama i tarifi federalnih upravnih taksi («Službene novine Federacije BiH», broj 6/98, 8/00, 45/10 i 43/13).

Uputa o pravnom lijeku:


Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva u roku od petnaest dana od dana prijema Rješenja.

Žalba se predaje ovom organu neposredno ili preporučeno poštom. Žalba se taksira sa 15 KM administrativne takse prema tarifnom broju 3. Tarife federalnih administrativnih taksi.

Obradivač akta:

Nermina Hodžić, dipl.ing.grad.

Po ovlaštenju
Rukovodilac sektora za izdavanje vodnih akata



Haris Ališehović, dipl.ing.grad.

Dostaviti:

- «MGV GRADNJA» d.o.o. Zavidovići
ul Tvornička bb, 72220 Zavidovići
- AVP Sava, ISV-vodna knjiga
- Sektor 50
- Sektor 40 – arhiva
- oglasna ploča – AVP Sava